

## Kálag eche Jemse Ndibned ní kálag

Kálag echë Jemse átélé ehóbé tângene mekan níme bad bé Krísto bétáŋgéné abel pónde ésyāā́l á alonǵé ádāb. Bad bé Dyōb ábe bépáŋtédé áte nkōŋsé áte nísyāā́l bōo Jemse ánteléé ch́. Abēnlédé ngan híin áléb bad bé Krísto tângene metón híin. Mmē metón médii, ábé nh̄on ne ábé atóg, mekəgsen, abé á bwām, áh̄on bad nkōŋtéd, adúbe ne mbeltéd, ngáne bad bé Krísto bétáŋgéné echém abenled, áwón debyéé, nselag, kúmbe ne asuded á yāl, ábíded mbakú á yāl e bad, ákum ekáá á t̄l, áwesen, ne ákáne.

Jemse awédé áte á kálag tē wê nén aá mbeltéd níkag ekuu ehóg ne adúbe.

### **Nkabtéd ní kálag**

Ndibned ní kálag *1.1*

Adúbe ne áwón debyéé *1.2-8*

Abé atóg ne ábé nh̄on *1.9-11*

Ákəg ne ákud mekəgsen *1.12-18*

Áwóg ne ábel *1.19-27*

Ngabén eéhednadté *2.1-13*

Adúbe ne mbeltéd *2.14-26*

Ngáne mod a Krísto ábenladté echém *3.1-18*

Mod a Krísto ne mekan mé nkōŋsé *4.1-5.6*

Elébé émpēe *5.7-20*

<sup>1</sup> Mē Jemse, mbaledē a Dyōb ne awē Sāŋgú Yesu Krístəə, mē-éé ntenle nyé enén kálag. Nlente nyé

metúmbé dyôm ne mébe mé bad bé Israel níme  
mépánjtédé áte nkõhsé áte nsyāāl.

*Jemse aá bad bédúbe Krístəə*  
*béwõh-’ε debyéé*

<sup>2</sup> A-baányan, póndé ké ehéé echě nyaa e  
mekəgsen ké ehéé étané nyé, nyétéd nê e’bon é  
yāl áte. <sup>3</sup> Nyébíí nén bán nímén mekəgsen níme  
nyékudéé áyāl e adúbe áde nyéwóó, méwéde nyé  
nlém á abum. <sup>4</sup> Nlém n̄wúu nyé á abum káəh á  
asóg âbel bon mbeltéd n̄mēn n̄tyéem bwâm n̄lôn-  
ne mbon, âbel bon nyéewóó’ abé dé mbéb ké ahóg  
á alongé ádēn.

<sup>5</sup> Nyé ké ahéé awě atóge’ debyéé, áchān Dyõb  
aá ábe mó. Dyõb d̄oó ábage moosyāāl debyéé ne  
nlém nhóg, ésebán akwognad modmod, ābe-’ε mó.  
<sup>6</sup> Bon pen nzé nyéchāa Dyõb nyédúbé bán ábe  
nyé chõm éche nyésédte mó ésebán nlém n̄káadte  
nyé á abum. Mod awě nlém n̄káadteé á abum  
ádii néε edíb é nkwe’ éche éhode’, epub éhúene’  
mendíb ped enén étimne eníníí. <sup>7</sup> Ene ndín e mod  
eewémtán aá mókũd chõm wéε Sāngwéé. <sup>8</sup> Adii  
mod awě awóó nlém n̄be, eechān̄nád-taá hõm  
ahóg áyāl e kéchéé éche ábeléé.

*Betóótōkē bé bad ne beh̄n bé bad*

<sup>9</sup> Mod a Krísto awě eésě etógnén á’sō é’ bad  
bémpēe atāngéné abé kúmbe nzé Dyõb áchāgté mó  
ám̄n. <sup>10</sup> Mod a Krísto awě adé etógnén á’sō é’  
bad bémpēe atāngéné abé kúmbe nzé Dyõb ásúdté  
mó. Nhóbe nén áyāle āmaá melemlem ngáne  
ébéneεé mbonja e nkəákəə awě adé á ahín-tē. <sup>11</sup> Nzé  
enyen épene ne ngíne ábe e’hyé bé ekíde é’belé  
é’hyáád ane nkəákəə, éche mbonja-’ε ébelé ésoo,

e'boŋ é'bāb-pe é'belé é'maa. Melemlem nê dōo behon bé bad bémaá'é anan áde bénanéé nímāb nhon ámbid.

*Jemse ad mekagsen méehūu'é wée Dyöb*

<sup>12</sup> Nnam ne kénzée awě awēséné mekagsen, áyāle nzé atómé nímê mekagsen áte, Dyöb débe mó nsábe níme rídé alongé áde áhóbé aá móṣbě bad ábe bédáá mó. <sup>13</sup> Nzé mod akudé mekagsen eetāŋgenéé ahób aá, “Mmén mekagsen méhúú wée Dyöb.” Mod eéhēlē-se ákag Dyöb ne ebébtéd, melemlem ngáne Dyöb-pe déekagéé mod ábel mbéb. <sup>14</sup> Mewēmten mé mbéb mé mod mwēn móo mékəə boŋ ahún á mekagsen-tê, ene pónde-'aá nímê mekagsen métédeé mó nlém á abum boŋ mehaŋ mó. <sup>15</sup> Mmê mewēmten níme mébág mod áte mó-'aá mépeene mbéb, nzé nímê mbéb-pe ríkwógé mod áte, nípiinad mó kwééd.

<sup>16</sup> A-baányan bé edaŋge nyéēdōgnād. <sup>17</sup> Nde e bwām ké ehée ne kéchéé éche éloné mbon éhúú ne Titée awě adé ámīn. Titée mó ahagé bwēm é'syāal ábe é'pene ámīn. Abén bwēm é'pene-ε nhəŋlén ne nhəŋlén, boŋ Dyöb pen déehəŋlanné. <sup>18</sup> Dyöb dēmbel ntíi ábe syánē alongé dékōlē abe áde ámbéé syánē échē eyale é mbále. Ambel nê ábel boŋ átintē e nímē nhəgtéd rísyāal, syánē débê ngáne mbote e'só echě bébagéé mó née mende.

*Jemse ad bad bé Dyöb bébele ngáne eyale é Dyöb éhóbéé*

<sup>19</sup> A-baányan bé edaŋge, nyébii nímén mekan. Mod téé ábê mehél áwóg dyam áde mod ampée áhóbéé, mod eewámsán dyam ahób pen, mod eewámsán-ne aliŋ. <sup>20</sup> Meliŋgá mé mod

méemwagké-se ábēl mekan míme Dyöb áhedéé aá ábel. <sup>21</sup> Né-óó nyétede mekan mé mbinde ne mekan mé ebébtéd mésyāāl míme nyébeleé. Ne asuded á yāl ásyāāl, nyékob eyale éche Dyöb áwéné nyé á nlém-té. Echē eyale chóó Dyöb ábenladté áson ádēn alongé.

<sup>22</sup> Nyébele ngáne eyale éhóbeé. Nyéēdōgē yāl se nyéwōgē chó wógēn. <sup>23</sup> Kénzée awē awóge' eyale é Dyöb, ésebán abele' ngáne éhóbeé, adii née mod awē anone' ábe e'só á dyené. <sup>24</sup> Amaá eche yāl anyín, bon aké áde ákagké, abelé áchatén ngáne e'só é'díí mó. <sup>25</sup> Bon bad ábe békoo' mbéndé echē etāngéné anōn áte, mbéndé eche ehúde' bad á mehan, nzé béhíde chó ngáne éhednadté saké bán béléá' chó bon béchatén-ne, bon pen, béhíde chōm éche éhóbeé, Dyöb dénaméd bó áyāl e kéchéé éche bébeleé.

<sup>26</sup> Mod ké ahée awē awémténé aá móbele' ngáne Dyöb áhedéé bon eekóbe éche échém, ene ndín e mod adoge eche yāl, ádē abele á Dyöb-pe, ádé ngēn. <sup>27</sup> Abele Dyöb nyaa eche esáá ne eche etāngéné á'sō é' Dyöb Titée, adii ānōn menyuu ne bekúd ábe bétage', ne ácháā yāl bwām ésebán mekan mé mbinde mé nkōnsé méwóge mod áyāl.

## 2

### *Jemse aá béētēdē baahóg etógnén ábiníí-'e nkójtéd*

<sup>1</sup> A-baányan, nyé nēngáne bad ábe bédúbpé eched Sán, Yesu Krístā, Sāngwée awē échē edúbé échábé ámīn, nyéetāngeneé née nyényíné mod á dīd-te se nyétedé mó etógnén ké-'e nkójtéd. <sup>2</sup> Détéd

bán mod asólé wéε nyéládné, ahédé nzêd é gól, ahédé-’ε kase é mbóté, ntógétōke mí mod mómpē rísólé, ahédé mbóté é mbinde. <sup>3</sup> Nzé nyêbagé mod awě ahédé kase é mbóté edúbé boŋ nyéláŋgé mó bán, “Hyě édyεε enén kase e e’dii,” boŋ nyéláŋgé-’ε ntógétōke mí mod bán, “Tyéém hê,” ké’ε bán, “Dyεé á ndɔɔb tê hê,” <sup>4</sup> né nyélúmté bán baahóg bétómé ábíníí, né nyékáadte-’ε bad ne mewémtεn mé mbéb.

<sup>5</sup> A-baányanŋ bé edəŋge, nyéwóglan. Eesaá mbále nén bán Dyɔb ápwédé betóótōkē bé bad á nkōŋsé te aá bédúbe Krístəə-yε? Adé adúbe dós-’aá adé nímāb nhən, apwεdé-’ε bós ábé bad ábe bébē áwē nkamlεn. Mmē nkamlεn móo áhóbé aá móɔbě bad ábe bédósó mó. <sup>6</sup> Boŋ nyéetédεé betóótōkē bé bad néε dyam. Saá behən bé bad bós bétagte nyé-yε? Eesaá mbále bán bós békene nyé á kóte-yε? <sup>7</sup> Eesaá mbále bán bós béhóbe đin dé edúbé áde ane awě akamlan nyé mekan mé mbéb áyāl-ε?

<sup>8</sup> Nyéēběl dyam áde átəŋgéné nzé nyêkoo’ mbéndé e nkamlεn eche Krístəə ahíd eche éténlédé nén bán, “Edəŋ mwănyonŋ ngáne édáá echonŋ yāl.” <sup>9</sup> Boŋ nzé nyêtede baahóg etógnén ábíníí-’ε nkóŋtéd, né nyébele mbéb, né mbéndé e Dyɔb-pe ekóbé nyé néε bad ábe bébóó mbéndé. <sup>10</sup> Kénzée awě ahíde mbéndé boŋ abós mbéndé póg, né abós mbéndé ésyāāl. <sup>11</sup> Mod awě ahóbé aá, “Nyéekábé mesón á ndáb e e’wónŋgé,” mó ahóbé ámpē aá, “Nyéewúé’ bad.” Né-ɔó, nzé mod eekábé mesón boŋ awúé’ bad, né abós mbéndé. <sup>12</sup> Nyéhóbe dyam, nyébele-’ε mekan néε bad ábe bébíí bán Dyɔb dékāād bós, nchoo ne eche mbéndé éche éhúde bad á mehanŋ-tê. <sup>13</sup> Mod awě eewóge

mod ampée ngɔl, Dyöb-pe déewógké mó ngɔl nzé akáadte bad. Boŋ mod awě awóge bad bémpēe ngɔl, éewógké mbwóg mbwe níme Dyöb ákáadteé bad.

*Jemse aá nzé adúbe déekii ne mbeltéd né áwédé*

<sup>14</sup> A-baányan, nzé mod ahóbé aá módūbpē Krīstəa boŋ eébélē mekan níme mélūmte bán awóo adúbe, bwām é'héé é'dé áhed? Adē adúbe áhele ásōŋ adē alongé-ye? <sup>15</sup> Dětéd nén bán mwānyon a Krīsto nhóg eewóo'é chōm éche áhāgkē á yāl, eewóo-'áa ndyééd e epun é bīn. <sup>16</sup> Boŋ nyé mod nhóg alángé mó aá, “Ekag bwām, ékud chōm éche éhāgkē, ékūd-te ndyééd éche édyāgkē.” Nzé nyélangé mó nê ésebán nyébage mó chōm éche átógnéné, né bwām é'héé nyébélé mó? <sup>17</sup> Melemlem nê dǒǒ édíí ne adúbe. Nzé mod awóo adúbe áde éebeléé ngáne ádē adúbe áhóbéé, né ádē adúbe áwédé.

<sup>18</sup> Mod nhóg ālāā me aá, “Mod nhóg awóo adúbe, aníní-'e abele mekan mé bwām,” me-'e mētímtén mó meé, “Lúméd me ngáne mod áhele awóŋ adúbe ésebán abele mekan mé bwām, mélūméd we ádēm adúbe áyāl e mekan mé bwām níme mbeléé.” <sup>19</sup> Edúbpé nén weé Dyöb ádíí ahóg. Nê ádé bwām. Kááŋne e'dəədəŋ bé mbéb bōmpē é'dúbpé nê, é'nəə-'e ne mbwóg. <sup>20</sup> A-eyókél é mod, ehede weé bélúmed we nén bán nzé mod awóo adúbe boŋ eébélē ngáne ádē adúbe áhóbéé, né ádē adúbe déesaá dyaamyam-e? <sup>21</sup> Cheé ênkǎŋ boŋ Abraham, awesyánē sáá ambáá, ákobnéd á'sō é' Dyöb née mod awě abele' mam níme Dyöb áhóbé? Saá akwenten áde ânkwenténné ábe awe mwān Aisige née mendε-ye? <sup>22</sup> Nyényíné nén bán adúbe áde

Abrahamε ne nímē mbeltéd békágé'áá ekuu ehóg, nímē mbeltéd-te mēnkǎŋ áde adúbe álón mbon. <sup>23</sup> Nén dēmbēl eyale é Dyöb énnýinnēd mbále ngáne éténlédé nén bán, “Abrahamε andúbé Dyöb. Nén dēmbēl Dyöb dēnkob mó nēngáne mod awě abele mekan níme métǎŋgéné.” Né-óó, bad bēnchǎg Abrahamε bán nsón a Dyöb. <sup>24</sup> Nyēnyiné nén bán mbeltéd mí mod nibele boŋ mod ákobnéd á'sō é' Dyöb née mod awě abele' mekan níme métǎŋgéné, saké adúbe dēmpen. <sup>25</sup> Melemlem nē dóo émbēē ne akwalεε awě béchágé'áá bán Rahabe. Ankobnéd á'sō é' Dyöb áyāle bad bé Israel ábe bēnlōmmē bán béhyε bēnɔn dyad áte á mesɔm-tē. Anköb bó nken, abídéd-te bó á dyad-tē, nzii empée á mesɔm-tē. <sup>26</sup> Ngáne yǎl e moonyon echē eewóo edǎdǎŋ éwédé, melemlem nē dóo adúbe áde déekǎg ne mbeltéd áwédé.

### 3

#### *Jemse aá mod-té ákamlan échē echém*

<sup>1</sup> A-baányan, nyé bad híin nyéebág bemeléede bé eyale é Dyöb. Nyébíi bán Dyöb dékáād se bemeléede tómaa ngáne ákáádté ábíníi bad. <sup>2</sup> Syánē baásyāāl debele mewusé á rǎhóbtéd. Kénzée awě éēbēlē awusé á rǎhóbtéd adíi mod awě ádē abé átyéémé, ahele-ε eche yǎl akób ábel boŋ eēbēlē awusé. <sup>3</sup> Détéd eláŋsén ne hósε. Nzé mod ahede aá hósε ébel ngáne áhedεé, abelé ahé chó chöm á nsəl-tē. Echē chöm chó-'aá ábenladté ályóged ene hósε kéhéé wée áhedεé aá éke. <sup>4</sup> Ké'ε détéd eláŋsén ámpē ne böle é'mbáá ábe é'dé á edíb é nkwě-te. Kénée édíi bán é'kálé bwāmbwam, epub é ngíne

chó-'aá éκεεne bó, mod awě adole' ábê bǎε mwǎ abámbe móō ábenladté áκεεn bó kéhéé áde ádáá.  
<sup>5</sup> Melemlem nê dóó édii ne echém. Kénεε édii bán édé mwǎmpin á yǎl e moonyon, édé kúmbe bwâmbwam áyǎl e nímē mbeltéd.

Nyényin ngáne mwǎ muú ahele se ahyáád ahín ámbáá. <sup>6</sup> Echém ámpē édii nêngáne muú. Edii pεd e yǎl e moonyon póg, ébele' mbéb ní kamlan yǎl e moonyon esyǎál. Ébele' alongé á moonyon ásyǎál abé nêngáne ákóbné muú, muú níme níbidé á dū-á-muú, níme méēđimē'. <sup>7</sup> Moonyon akamlan nyaa é nyam ésyǎál. Akamlan nyam é mehín, ákamlan menon, ákamlan nyam éche édole abum ásē, ákamlán-ne nyam ésyǎál éche édé á edib é nkwx-te, ambootéd-te chó akamlen se á mbooted. <sup>8</sup> Bon modmod ééhélēε-se ákamlén echém. Echém édii chǎm é mbéb éche modmod éehelēε-se ákamlen, éloné-'ε ne e'we bé mbéb ábe é'pεene' kwééd. <sup>9</sup> Chóó débēnladté áκεεn Sǎngú Dyǎbe, awêd Titée, chó-'aá débēnladté ábe moonyon ebómán. Moonyon mó-'aá Dyǎb áhágé áwágεn mó. <sup>10</sup> A melemlem mé nsal dóó e'yale bé mekenag ne ebómán bébidεé. A-baányan, éetǎngénεé abé nê. <sup>11</sup> N'yélé mé edib nhóg méehelēε-se mébidtē mendib níme mésáá ne mé mbinde abided ahóg. <sup>12</sup> A-baányan, alín dé asáá déehelēε-se áchyáá e'pum é píε. Ké'ε alín á sabé déehelēε-se áchyáá e'pum é' mesáá. Edib-pe éche ébidte mendib mé nkwx, éehelēε-se ébidéd mendib níme mésáá.

### *Debyéé áde áhúú ne Dyǎb*

<sup>13</sup> Mod adé átintē echên awě awóó debyéé awón-ε nsónɥen-ε? Alúmed nê ne alongé á bwám áde



áwóó, áyāl e kéchéé éche ábeleé. Abel nê ne asuded á yāl áde debyéé áde áwóó ábélé bon awón. <sup>14</sup> Bon nzé nyêwóó kán áte eche edé mbéb, nyétōñtan-ne dásō échen yāl, nyéēbenlád debyéé áde nyéwóó ábel mbéb tñgene ayáge á mbále, akum áde nyékuméé ekáá á tâl, <sup>15</sup> ene ndín e debyéé eehúé'é ne Dyöb. Edii debyéé áde áhúú ne bad bé nkōñsé. Adii debyéé áde áhúú ne bad ábe béewóó Edáádāñ é Dyöb, debyéé dé edáádāñ é mbéb. <sup>16</sup> Kéchéé wéé bad béwóó kán áte echē edé mbéb, bétōñtān-ne dásō échab yāl, mpuutéd mbélé mbé, nyaa e ebébtéd ké ehéé-'ε ebāg áhed. <sup>17</sup> Bon debyéé áde áhúú ne Dyöb áde nhāñlén. Kénzéé awē awóó áde debyéé eewóó'é atón dé mbéb ké ahóg áyāl. Ene ndín e mod adāə nsāñ, apwiitad, achede yāl áwóglēn bad bémpee, awóo ngol bwāmbwam. Abenle bad mekan mé bwām ésebān akwāgnad modmod, abele-'ε nê ne nlém nhóg. <sup>18</sup> Nzé bekóm bé nsāñ bébele nsón míme nīpēene' nsāñ átíntē e bad, nê débēl bad bébéle mekan míme Dyöb áhedéé.

## 4

### *Jemse áá bad bésuded yāl, Dyöb ákamlēn bō*

<sup>1</sup> Cheé épēene nzum ne nselag átíntē echēn? Eesaá mbále bán esíí é awón á bwēm éche éwane nyé nzum áte, chōó ékəə' bon nyébele nēn-ε? <sup>2</sup> Ehedē chōm bon weékudéé chō, nê ábélé ewúú mod. Ewóó esíí áte bwāmbwam ákud chōm bon weéhéléé chō akud. Nê ábélé nyēsenle, nyéwanne-'ε nhóg ne aníníí nzum. Nyéékūdēē chōm éche nyéhédéé áyāle nyéēsēdtēē Dyöb chō. <sup>3</sup> Nzé nyéhēdne Dyöb chōm, nyéékūdēē chō áyāle nyéhēdne chō mewēmtēn mé mbéb. Nyéhēde

bwēm dāsō áwóged échen yǎl menyinge. <sup>4</sup> Nyêdé nêngáne bad ábe bédé á ndáb é mewóngé, boŋ bébé békābē mesón. Nyéebíí'é bán ábane nlém ne mekan mé nkōŋsé ábele nyé bad bé ekoyí bé Dyōb-ε? Né-ᵛ kénzée awě adəá nlém abane ne mekan mé nkōŋsé, abelé eche yǎl mod-a-ekoyí a Dyōb. <sup>5</sup> Nyêwémténé bán ngên-εé éténlédé á kálag e Dyōb nén bán, “Dyōb ábánné nlém aá edəádəŋ éche móhédé syánē áte, ébē échē, adé-’ε kónjí ne ch-ýε?” <sup>6</sup> Boŋ Dyōb ábage syánē nsimé abε ne abε. Nê d-’aá ákəá boŋ éténlédé á kálag e Dyōb nén bán, “Bad ábe bédé kúmbe, Dyōb ákunnad bó yǎl, boŋ ne bad ábe bésúdté yǎl, Dyōb ábage bó nsimé.”

<sup>7</sup> Né-ᵛ, nyésuded yǎl á’sō é’ Dyōb. Nyéwúen Satanε nló áte. Nzé nyêbelé nê, m-’ε átom mehélé. <sup>8</sup> Nyépe Dyōb benben, mómpē āpě nyé benben. Nyé bad bé mbéb, nyésōg mbéb abel. Bad-te ábe bəwóó nlém níbe, nyébane nímen nlém ábel mekan níme mésáá. <sup>9</sup> Nyésuden áyāl e nímen mbéb. Nyélebe’, nyéchyε-’ε. Nyésōg awᵛᵛ, nyélebe’ lebén, nyésōg menyinge awóg, nyésuden sudnén. <sup>10</sup> Nyésuded yǎl á’sō ábe Səŋgwéé. Nzé nyêbelé nê, áchəgəd nyé.

### *Jemse áá mod eekáadté mwǎnyan*

<sup>11</sup> A-baányan, nyéehóbé nhóg ne aníníí mam mé mbéb á yǎl. Kénzée awě ahóbe mwǎnyan mam mé mbéb á yǎl, ké’ε akáadte mó, né ahóbe mbéndé e Dyōb mam mé mbéb áyāl, né ahóbe-’ε aá ene mbéndé eéboo’é. Nzé ehóbé wεé mbéndé e Dyōb eéboo’é né weébēlēē chōm éche mbéndé éhóbé aá bēbel. Boŋ né etédé etál échē éesě échōŋ ábē mod awě akáadte. <sup>12</sup> Mod nhóg mwěmpen-εé adé awě abage’ mbéndé, mwěmpen-naá akáadte bad.

Mwěmpen-εέ ahele ásōη alongé á bad, mwěmpen-naá ahele abébéd dó. Boη we, nzé-módé édíí ákáad mwānyoη?

### *Jemse aá mod eebág kúmbe*

<sup>13</sup> Bəəb-pəə, nyéwóglan, nyé bad ábe nyêhóbe bán, “chii ké’ε chän, séēkě dyad dekalengəme, séēdyéé áwed mwě nhóg, sékábē nyoηgé, sékudé’ε nsyóη.” <sup>14</sup> Nyêbíí dyam áde débenléd chän-ε? Chán nyébíí bán alongé ádēn ádé? Alongé ádēn ádíí nēηgáne mbag. Ebág á esóη é póndé, ámbíd enê, weenyínéé chó ámpē. <sup>15</sup> Chōm éche nyétāηgéné ahób édíí nēn, “Nzé Dyōb ákwénténé, né séēbē á alongé, sébēl-le ádēn dyam ké’ε ádíí.” <sup>16</sup> Boη bəəb, nyêtimé nyékume ekáá á tâl ne kúmbe esyáál. Enén ndín e akum dé ekáá á tâl eetāηgené. <sup>17</sup> Né-pəə, kenzéé awě abíí dyam á bwām áde átāηgéné abel, boη eébele dó, abelé mbéb á’sō é’ Dyōb.

## 5

### *Jemse aá behən bé bad bétéd póndé*

<sup>1</sup> Nyé behən bé bad, nyéwóglan me! Nyéchyε’, nyéhágke e’saad áyāl e metake míme mépií nyé. <sup>2</sup> Mmén nhən míme nyékúme mímáá abəə, síi-ε émáá nyé asāη adyé. <sup>3</sup> Echen gól ne sílva éche nyélímmé ásē, émáá ngag akób. Ene ngag eche ekóbé ábê bwēm, chó ēbēl boη Dyōb ákógsén nyé, émād-te nyé ásē néε muú. Nyékúmmé yāl nhən enén póndé echē edé benben ne e’pun bé asóg. <sup>4</sup> Nəné’, weesābpεé bad ábe bēbēnlé we nsón á nzag-tê. Etímé edogé bó dogén. Nēn ábélé ábê bad ábe wéēsābpεé ádab awé áwógnad á’sō

wέε Titέε, Dyõb á Ngum. <sup>5</sup> Abé áde nyédíí á nkõñsé hén ádíi áchog alongé, nyébele-’ε kéchéé éche nyédáá. Nyêkódte mίmen mewêmten, kénéε nyébíí bán epun éche Dyõb dékõgsennē ábē bad bé ekoyí ékwógé apε. <sup>6</sup> Nyêhóbé bán bad ábe bébele mekan míme métáñgéné á’sõ é’ Dyõb bédé bad bé mbéb, nyêwúú-’ε bó. Béeheléé nyé atyéemen.

### *Jemse aá bad béwεsen metake*

<sup>7</sup> Né-õó a-baányan, nyéwεsen kááñ Sánḡwéé apε. Nyétêd eláñsén ne mod awě abele nzag. Abelé ásin kááñ ne pónδέ echě ápādtē mbote é bwâm. Awεsan kááñ ne á pónδέ eche mbúú e’só ébootadté achó, ne áde édimtanné achó. <sup>8</sup> Nyémpē nyéwεsen, nyéwéd-τε nlém á abum, nyésine’ epε éche Sánḡwéé, édé benben. <sup>9</sup> A-baányan, nyéēnyonḡé áte tâñgene nhóg ne aníníí âbel bon Dyõb déêhōbē aá nyêdé bad bé mbéb. Nyébii nén bán mod awě akáadte’ adé nyé benben. <sup>10</sup> A-baányan, nyétêde e’chemléd ne bekal bé’dáádāñ. Békálé’áá nkalan á dīn áde Sánḡwéé, békudé metake, béwεsán-ne mímē metake. <sup>11</sup> Ne mbále, syāā dechəge bad ábe béwéséné bán bad ábe békudé nnam. Nyêwógé ngáne Jobε ânwεsenné áde ákudé metake, nyēnyín-ne ngáne Dyõb dêmbenlé mó bwâm á asóg. Sánḡwéé aboó nlém bwâmbwam awóó-’ε nlém ní ngal.

<sup>12</sup> Amín e mímén mésyāāl, a-baányan, nyéēbenlād dīn dé nkoñ mímín, ké’ε dé nkõñ nísé, ké’ε chõm émpēe âmwé melě. Bon pen, nzé ehóbé“εε” abé εε, nzé ehóbé-’ε “Aáy” abé aáy. Nzé nyébelé nén, né Dyõb déekõgsenné nyé.

13 Kénzée awě adé á metake tē, ákânne. Kénzée awě awóge menyĩge, ákóne ákené-'ε Dyõb.  
 14 Kénzée awě eedyεε bwâm, áchag belyáged bé mwembé, békânned mó. Nzé békânnad mó béwōgtē mó dyõg á dñn áde Sánḡwée. 15 Nzé édé bán békânnédé mó ne nlém nhóg, né Dyõb déwōg bó mekáne, nê déběl-le mod a nkole ádyεε bwâm. Sánḡwée ábēl áhídē á anoy dé nkole, ádyεε bwâm, ké mbéb-pe mōō ámbenlé Dyõb délagsén mó. 16 Né-óó, nyépale mbéb áte wée nhóg ne aníníí, mod tée ákânned-te mwānyay, ábel boy nyédyεε bwâm. Mekáne míme mod awě abele mam míme métāḡéné á'sō e' Dyõb, médé ngíne bwāmbwam, mébele-'ε nsón. 17 Elaijaa abédée moonyoy melemlem ngáne syánē. Póndé póg ankáné bwāmbwam aá mbúú eechóg, mbúú enkēnchó-'aá á etún é mwě ríláán ne eped.  
 18 Ambid enē ankáné ámpē, Dyõb ábēl mbúú echó, bwēm é'bootéd-te akwog.  
 19 A-baányay, nzé nyé ké ahée atēdté áhíd nzii e mbáale e Dyõb, boy mod ampée abelē atīmne mbíd,  
 20 ábíi nén aá, kénzée awě abelē boy mod awě abelē mbéb asóg mbéb abel, né asoó alongé áde mod awě abelē mbéb. Nén déběl-le mbéb híin míme ane mod ákébenlé, Dyõb déenōnné mó á dñd.

**Mel̃ Mékōōlē**  
**New Testament in Akoose (CM:bss:Akoose)**

copyright © 2011 Wycliffe Bible Translators, Inc.

Language: Akoose

Translation by: Wycliffe Bible Translators, Inc.

Akoose

bss

Cameroon

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Akoose

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

---

PDF generated using Haiola and XeLaTeX on 11 Nov 2022 from source files dated 29 Jan 2022

0143729f-907e-5098-b6ce-63b1629b8e48